



Guido Huonder, Cuera / Sedrun

25.02.1935 – 24.09.2004

NB - Dacuort ei Guido Huonder morts nunspetgadamein. Ils 29 da settember ha in grond pievel priu cumiau dad el ella baselgia dalla sontga crusch a Cuera. Era da Tujetsch eran divers vischins, denter auter era ina delegaziun dall'annada 1935, vegni per prender cumiau da lur cumpatriot. Nies convischin, sur Giusep Jacomet, spiritual dils spitals da

Cuera ha fatg la messa – per part era en romontsch - per siu amitg e lectur dils survetschs divins el spital dalla crusch.

La gronda participaziun dil riug da bara cumprova la gronda stema che Guido Huonder gudeva. El era in carstgaun curteiseivel e da bien contact. Speciala af fecziun haveva el per ils impedi, per ils quals el s'engaschava fetg. Sper quella vart sociala s'interessava el era per la cultura. El ei staus differents onns com member dil Chor viril Alpina e dil Chor mischedau Rezia da Cuera ed il davos dil Chor bizantin che ha lu era priu cumiau da siu commember cun in cant impressiunont. Il Guido legeva era bia e s'interessava specialmein dalla politica. Ina ulteriura occupaziun el temps liber era il cuorer. Quasi mintga di fageva el in per kilometers ed el fageva era part da concurrenzas, sco per exempl dallla cuorsa da Murten. Il venderdis sera era mintgamai reservaus per in da ses hobis preferi, il dar troccas. Dapi ver 40 onns era el commember d'in club da troccas da Cuera. Ensemen cun enzacons camerats da Tujetsch e dalla Cadi passentava el mintgamai enzacontas uras en buna cumpignia. Sco cassier organisava el mintg'onn ina tscheina ni ina tura. Pér avon biabein in meins ei il club staus sil Rigi. Mintgaton mava il Guido era si Tujetsch per visitar ses parents, per encuirir izuns ni per ir cun skis. Malgrad ch'el ei suenter scola adina staus naven, ha el buca emblidau sia patria. Beinduras raquintava el reminiscenzas dil temps da buob si mises orasi la Val, sco fumegl a Rueras ni sco pastur e starler si d'alp.

Suenter ver finiu la scola serenda Guido a Turitg per fa igl emprendissadi da dessignader da betun. Suenter vegn el a Cuera. Leu stat el l'entira veta cun excepciuon d'enazacons onns a Lugano nua ch'el era serendius per motivs da sanadad. El plaz da laver era el respectaus pervia da sia gronda cumpetenza e diligenza. El

era medemamein instructer dils emprendists ed haveva leu in bien maun sco quei ch'ils resultats dils examens demussavan. Igl onn 1964 marida Guido la giuvna Hanny Scherrer da Mastrils e da quella letg derivan ils fecls Philipp ed Iso. Cul vitg da sia dunna haveva el stretgas relaziuns e perquei rauissa el ussa el santeri da quei vitg, sper l'enconuschenta baselgia da pelegrinadi da sogn Antoni.

Il Guido lai anavos ina gronda largia tier sia famiglia, denton era tier ses amitgs ed econuschents. El rauassi en pasch!